

Uunga siunnersuut: Aatsitassanut tunngasunik suliaqarneq pillugu Inatsisartut inatsisaata allanngortinneqarnera pillugu Inatsisartut inatsisaat

(Inuussutissarsiornermut, Aatsitassanut, Nukissiutitut, Inatsisit Atuutsinneqarnerannut Naligiissitaanermullu Naalakkersuisoq)

Uunga siunnersuut: Aatsitassat pillugit ingerlatallu tamatumunnga pingaarutillit pillugit inatsisartut inatsisaata (aatsitassanut ikummatissanullu inatsit) allanngortinneqarnera pillugu Inatsisartut inatsisaat

(Inuussutissarsiornermut, Aatsitassanut, Nukissiutitut, Inatsisit Atuutsinneqarnerannut Naligiissitaanermullu Naalakkersuisoq)

Saqqummiussissut**Siullermeerneqarnera**

Naalakkersuisut sinnerlugit matumuuna aatsitassanut tunngasunik suliaqarneq pillugu Inatsisartut inatsisaata allanngortinneqarnera pillugu Inatsisartut inatsisaannut siunnersuut aamma Aatsitassat pillugit ingerlatallu tamatumunnga pingaarutillit pillugit inatsisartut inatsisaata (aatsitassanut ikummatissanullu inatsit) allanngortinneqarnera pillugu Inatsisartut inatsisaannut siunnersuut saqqummiunneqarput.

Suliassaqaarfimmi ulluinnarni suliassanik suliarinninneq Aatsitassanut Ikummatissanullu Aqutsisoqaarfimmi aamma Aatsitassanik Suliassaqaarfinnut Avatangiisinut Aqutsisoqaarfimmi isumagineqassasoq, ullumikkut inatsimmi aalajangersagaavoq. Aqutsisoqaarfiit suliassat suut isumagisarissaneraat, inatsimmi aalajangersagaavoq, aammalu aqutsisoqaarfinni aalajangiinerit naammagittaalliuutigineqarsinnaanerat inatsimmi maleruagassiivigineqarpoq.

Aatsitassanut suliassaqaarfimmi allaffissornermi misilittakkat takutippaat allanngorartitsinnaanerusumik aallaaveqarnissaq pisariaqartinneqartoq. Taamaattumik siunnersuutigineqarpoq suliassanik suliarinninnerup ilaata aqutsisoqaarfinni marlunni ingerlanneqarnissaa pillugu aalajangersakkat atorunnaarsinneqassasut.

Tunngavigineqarpoq maannakkut allaffissornikkut aaqquissuussinerup isumalluutinik atuiffiugaatsiarsinnaanera aammalu allaffissornermi inuussutissarsiortunilu suliassanik suliarinninneq kigaatsuutissinnaallugu. Taamaattumik suliassat aqutsisoqaarfinniit immikkoortortanut allanut nuutinnerisigut, suliassaqaarfimmi allatut aaqquissuussinissamut periarfissaqarnissaq Naalakkersuisut kissaatigaat.

Tamanna isumaqanngilaq aqutsisoqaarfiit aammalu maannakkut suliassat agguagaanerat tamakkiisumik ilaannaasumilluunniit atorunnaarsinneqassasut. Suliassat aalajangersimasut aqutsisoqaarfinni inissisimatinnissaannut Naalakkersuisut inatsimmi aalajangigaasumik pisussaaffeqarunnaartut, tamanna isumaqaannarpoq. Taamaaliornermi sapinngisamik

sunniuteqarluarnerpaamik suliaasaqarfimmi suliaasanik suliarinnittarnerup aaqqissuunnissaanut Naalakkersuisut periarfissaqalersinnaapput.

Aqutsisoqarfiit atuutsiinnarnissaannut imaluunniit Naalakkersuisut ataanni taamaaqataanik siunertalimmik immikkoortortanik nutaanik pilersitsinissamut siunnersuutit akornusiinngillat.

Pinngortitamut avatangiisinullu tunngasunik suliarinninnermut tunngatillugu naalakkersuinikkut akuliutinnginnissamut tunngaviusoq, imatut paasillugu suliaasaqarfimmut tunngatillugu oqartussap suliarinninnera suliaasanik suliarinninnermut allanut attuumassuteqanngitsumik ingerlanneqassasoq, aalajangiusimaannarneqarpoq, aamma suliaasat siunissami aqutsisoqarfimmiit naalakkersuisoqarfimmut nuutinneqassagalarpata. Tassa imaappoq, pinngortitamut avatangiisinullu tunngasut pillugit ulluinnarni suliaasanik suliarinninnerq Naalakkersuisoqarfimmit aatsitassanut suliaasaqarfimmi pissutsinik allanik suliarinnittartumit imaluunniit Naalakkersuisoqarfiup taassuma ataani immikkoortortamit ingerlanneqaqqusaassanngitsaq. Aammalu pinngortitamut avatangiisinullu tunngasut pillugit nalilersuinerit aalajangiinerillu suli ilisimatuussutsikkut sullissivinnit arlaannaannulluunniit attuumassuteqanngitsunit, suliffissuarnut atassuteqanngitsunit, ataatsimit arlalinniilluunniit ilanngussaqaarneq aallaavigalugu pisassasut.

Pinngortitamut avatangiisinullu tunngasut pillugit aalajangiinerit naammagittaalliuutigineqarsinnaanerit siunnersuummi aalajangiusimaannarneqarpoq aammalu Inatsisartut inatsisai malillugit pisinnaatitsisummik pigisaqartut aamma innuttaasut kattuffiillu naammagittaalliorsinnaanerit qulakkeerneqarluni.

Akuersissutit akuersissuteqarnerillu pillugit alajangiinernut maannamut Aatsitassanut Ikummatissanullu Aqutsisoqarfimmit aalajangiiffigineqartartunut tunngatillugu naammagittaalliorsinnaanerup peerneqarnera ajornartorsiutitaqanngitsutut isigineqarpoq, tassami misilittakkat takutippaat qinnuteqartut aammalu akuersissutit Inatsisartut inatsisaanni pineqartunut ilaasut malillugit pisinnaatitsisummik pigisaqartut kisimik naammagittaalliorsinnaaneq taanna atortaraat, taakkualu aalajangiinerup suliarineqarnerata qaqeqqinnissaa pillugu Naalakkersuisut qinnuiginissaannut suli periarfissaqartussaapput.

Kiisalu pisinnaatitsisummik pigisaqartut Naalakkersuisuni immikkoortortamik ataasiinnarmik attaveqaqateqartarnissaat pillugu tunngaviusoq (tunngaviusoq one door) aalajangiusimaannarneqarpoq.

Naggataatigut inatsisissatut siunnersuut nassuiaatillu tassunga atasut innersuussutigissavakka.

Taamatut oqaaseqarlunga Naalakkersuisut sinnerlugit siunnersuut Inatsisartunut suliaasanngortippara.